



Broj: 01-50-1-54-67/05
Sarajevo, 30. septembra 2005.

ZAPISNIK

67. sjednice Predstavničkog doma
Parlamentarne skupštine Bosne i Hercegovine,
održane 30. septembra 2005. godine

Sjednica je počela u 8,20 sati. Prisustvovalo je 36 poslanika.

Opravdano su odsustvovali: Abdulah Nakaš, Vinko Zorić, Zlatko Lagumdžija, Sead Avdić, Mirko Blagojević i Senija Kapetanović.

Sjednici su prisustvovali: ministar odbrane Nikola Radovanović, zamjenik ministra odbrane Enes Bećirbašić, te kopredsjedavajući Komisije za reformu odbrane Rafi Gregorijan sa saradnicima.

Iz međunarodnih organizacija sjednicu su pratili: Jelena Despot i Sanja Stanojević- OHR, Kristjan Haupt – OSCE i Mirsad Žiga – američka ambasada.

Predsjedavajući Nikola Špirić dao je uvodne napomene u vezi sa sazivanjem sjednice i prijedlogom dnevnog reda.

O prijedlogu dnevnog reda nije bilo rasprave, pa je predsjedavajući konstatirao da 67. sjednica ima sljedeći

DNEVNI RED

1. Prijedlog zakona o odbrani BiH (drugo čitanje) i
2. Prijedlog zakona o službi u Oružanim snagama BiH (drugo čitanje).

Ad – 1: Prijedlog zakona o odbrani BiH (drugo čitanje)

Predsjedavajući Špirić podsjetio je u uvodnim napomenama da je nadležna komisija usvojila osam amandmana, a da u plenarnoj fazi amandmane brane: Klub poslanika HDZ-Demokršćani – 22 amandmana; Klub SDS – 17 amandmana; Klub SDS-a – Mješoviti klub SPRS-a, nezavisni polsnici i poslanik PDP-a – sedam amandmana; Milorad Živković 17 amandmana; Mirsad Ćeman – četiri amandmana i Dušanka Majkić – jedan amandman, te da je Momčilo Novaković podnio dva amandmana pozivom na član 94. stav 3. Poslovnika Doma.

Dalje je predsjedavajući Špirić upoznao prisutne o tome da je neposredno pred sjednicu Doma održana sjednica Proširenog kolegija, na kojoj se s predsjedavajućim klubova razgovaralo o amandmanima. Rekao je, uz ostalo, da ima informaciju da je u Predsjedništvu BiH postignut određeni sporazum, s obzirom da Predsjedništvo BiH ima posebne nadležnosti u oblasti odbrane, te da bi taj sporazum mogao relaksirati stavove oko dijela amandmana. Naglasio je da očekuje da taj sporazum bude dostavljen poslanicima, pa je upitao da li je pomenuti sporazum neophodan da bi počelo iznjašnjavanje o amandmanima.

Momčilo Novaković rekao je da je i na Komisiji jedan od zahtjeva Kluba SDS-a bio da se član 57. Prijedloga zakona definira na drugačiji način, pa da zbog toga misli da se o amandmanima na taj član ne bi trebalo izjašnjavati dok pomenuti sporazum ne stigne. Ako ne bude sporazuma, onda treba da razgovaraju predstavnici svih klubova, pošto ima više amandmana na član 57., da se vidi šta je prihvatljivo za sve klubove, a ne samo za podnosioc amandmana, rekao je, uz ostalo, Momčilo Novaković.

Predsjedavajući Nikola Špirić predložio je da se počne sa izjašnjavanjem o amandmanima, a da podnosioci amandmana kažu na kojem amandmanu insistiraju, pa da se sa izjašnjavanjem sačeka dok ne stigne predmetni sporazum. Napomenuo je da su poslanici dobili pregled amandmana po redoslijedu članova Prijedloga zakona i da će se tim redoslijedom glasati.

U raspravi o određenim amandmanima učestvovali su: Filip Andrić, Šefik Džaferović, Martin Raguž, Momčilo Novaković, Milorad Živković, Beriz Belkić, Tihomir Gligorić i Jozo Križanović.

Krenulo se s izjašnjavanjem o amandmanima. Tokom glasanja predlagači su odustajali od jednog broja amandmana.

Kada je trebalo glasati o Amandmanu 9. Milorada Živkovića, Momčilo Novaković rekao je da se taj amandman i nekoliko amandmana Kluba SDS-a, Kluba SDS-a i Mješovitog kluba SPRS-a – nezavisni poslanici i poslanika PDP-a i Kluba HDZ-Demokršćani odnose na istu problematiku, pa je predložio da se preskoče ovi amandmani i glasanje obavi kasnije, kad stigne sporazum, ili da se da pauza.

Nakon kraćih konsultacija, uslijedila je pauza na zahtjev Kluba SDS-a.

Do pauze usvojeni su Amandman 1. Milorada Živkovića na član 3. Prijedloga zakona i Amandman 6. Milorada Živkovića na član 37. Prijedloga zakona.

Poslije pause, predsjedavajući Doma Nikola Špirić obavijestio je poslanike da je u toku pauze održana sjednica Proširenog kolegija, na kojoj se razgovaralo o preostalim amandmanima i mogućnostima njihovog povlačenja imajući u vidu sporazum postignut u Predsjedništvu BiH. Obavijestio je Dom da je sporazum potpisan. Također je obavijestio prisutne da je tokom pauze uslijedila i intervencija na usvojeni Amandman 6. na član 37. Prijedloga zakona, koji je podnio Milorad Živković, te da je rečeno da je njime narušen princip dogovoren na Zajedničkoj komisiji. Radi toga Kolegij predlaže da se Amandman 6. Milorada Živkovića ponovo stavi na glasanje, rekao je predsjedavajući Špirić.

Momčilo Novaković, nakon što je saznao da je potpisan sporazum u Predsjedništvu BiH, povukao je amandman na član 57, a Milorad Živković povukao je sve preostale amandmane.

Filip Andrić izrazio je neslaganje s prijedlogom da se ponovo glasa o već usvojenom amandmanu, rekavši da za to ne postoji poslovnička mogućnost.

Predsjedavajući Špirić odgovorio je da je o tome odlučio Kolegij kako bi se spriječilo da se narušava dogovoreni princip. Zatim je na ponovno na glasanje dao Amandman 6. Milorada Živkovića na član 37. Prijedloga zakona.

Ovog puta amandman nije usvojen. Za su glasala dva, protiv 15, suzdržalo se devet poslanika.

Dalje je predsjedavajući proveo glasanje o preostalim amandmanima koji nisu povučeni.

Nije usvojen nijedan amandman.

Prijedlog zakona o odbrani usvojen je s 29 glasova za i jednim protiv.

Ad – 2: Prijedlog zakona o službi u Oružanim snagama BiH (drugo čitanje)

Na Prijedlog zakona o službi u oružanim snagama amandmane u plenarnoj fazi podnijeli su: Klub poslanika HDZ-Demokršćani – 11 amandmana, Klub SDS-a – pet amandmana; Milorad Živković 11 amandmana i Mirsad Ćeman dva amandmana.

Nadležna komisija usvojila je 11 amandmana.

Predsjedavajući Nikola Špirić pitao je predsjedavajuće klubova da li su se stekli uslovi da odustanu od amandmana.

O amandmanima diskutirali su: Mirsad Ćeman, Filip Andrić, Momčilo Novaković i Martin Raguž.

Milorad Živković obavijestio je da odustaje od svih amandmana s obzirom da je u Predsjedništvu BiH potpisan sporazum.

Obavljane je glasanje o Amandmanu 1. Kluba HDZ-Demokršćani i Amandmanu 1. Mirsada Ćemana. Ovi amandmani nisu usvojeni.

Filip Andrić zatražio je da se, u skladu s članom 94. stav 3. Poslovnika, amandmanski intervenira na član 6. Prijedloga zakona, s obzirom na sporazum koji je postignut u Predsjedništvu BiH.

U ime Kluba HDZ-Demokršćani, Ruža Sopta zatražila je pauzu.

Nakon pause, predsjedavajući Špirić konstatirao je da je Klub HDZ-Demokršćani podnio amandman pozivom na član 94. stav 3. Poslovnika i izrazio nadu da je o njemu postignut dogovor. Pozvao je zatim podnosioc druge amandmana da od njih odustanu, a da se glasa o ovom novom amandmanu.

Filip Andrić obavijestio je da je Klub HDZ-Demokršćani spreman odustati od ostalih amandmana ukoliko se usvoji novi amandman na član 6. Prijedloga zakona.

Predsjedavajući Špirić dao je novi amandman na glasanje.

S 25 glasova za, pet protiv i jednim suzdržanim usvojen je Amandman Kluba HDZ-Demokršćani na član 6., podnesen u skladu s članom 94. stav 3, a koji glasi:

“U članu 6. u stavu (1) u prvom redu, ispred riječi “naroda” dodaje se riječ “konstitutivnih!”, a iza riječi “naroda” dodaje se sljedeći tekst: “(Hrvata, Srba i Bošnjaka)”.

Pošto je prethodni amandman izglasan, predsjedavajući Doma konstatirao je da su od preostalih amandmana odustali Milorad Živković, Momčilo Novaković i Filip Andrić u ime Kluba HDZ-Demokršćani.

Zatim je predsjedavajući na glasanje dao Prijedlog zakona o službi u Oružanim snagama BiH.

Zakon je usvojen s 29 glasova za i dva protiv.

Zaključujući sjednicu, predsjedavajući Špirić zahvalio je svim poslanicima što su dali konstruktivan doprinos na usvajanju ova dva veoma značajna zakona.

Sjednica je završena u 14,00 sati.

Sastavni dio Zapisnika je transkript 67. sjednice.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Nikola Špirić